



HEinricus Basileæ honestis parētibus in mino-
ri urbe natus est, anno 1522. Ibi à pueris operã
literis dedit, & sub Xisto Betuleio prima rudimen-
ta posuit. Cum autem postea anno 1529 religio Ba-
sileæ mutaretur, atq; magistratus in Dominicano-
rum monasterio aliquot ciuiũ filios collocaret, qui
in literis & pietate instituti, aliquando Ecclesiæ &
scholæ cum laude præesse possent, etiã Heinrichus
ob præclaram indolẽ receptus fuit. In eo loco per
decennium cõmoratus, diligenter literis incubuit,
preceptore primo Simone Sultzero, deinde Seba-
stiano Lepusculo, uiris doctis & pijs usus. Cum au-
tem adoleuisset, atq; artiũ cognitionẽ haussisset, ani-

num ad Medicinæ studiũ adiecit, & in eo plurimũ profecit. Inde anno 1544
liberalium artium Magister in patria creatus, ad tempus scholæ ad S. Petrum
præfuit, & iuuentutem instituendo nihil intermisit. Quoniam uerò altiora re-
spiceret, literarum Mœcenatibus D. Fuggeris à quibusdam amicis commen-
datus fuit, quorum subsidio in Galliam missus, & per triennium ibidem sustẽ-
tatus fuit. Inde in Italiam profectus, Pisis gradum Doctoris suscepit, & per se-
quiannum Florentiæ Medicinam factitauit.